

東華續錄

光緒二百一

臣朱壽朋敬編

臣汪錫增恭校

五月丁酉朔夏至節大祀 地於 方澤 上親詣行禮○戊戌諭朕欽奉 慈禧端佑康頤昭豫莊誠壽恭欽獻崇熙皇太后懿旨岑春煊奏廣東廣肇高欽等府州屬被災情形一摺本年入春以後廣州屬大雨如注西北兩江同時暴漲以致圍基衝決桑禾俱損房屋倒塌多傷人口災民流離堪憐深憫惻著頒發帑銀五萬兩由廣東藩庫給發卽著該署督迅飭派出各員認真察勘妥籌賑撫毋任一夫失所用副朝廷軫念災黎之至意○庚子雨○上御乾清宮法國使臣巴思德覲見呈遞國書○辛丑命孫寶琦幫辦津鎮鐵路○商部奏請頒發蘇省商辦鐵路關防得 旨如所議行○喬樹枏奏請各省設立法政學堂下學部知之○財政處戶部奏圖法爲立國之原其權固宜操之於上紙幣爲便民之計其制尤宜慎之於先臣部前因銀行業經開辦當卽奏明派員前往日本考查紙幣印刷事宜誠以紙幣之行全恃信用一經作僞其害不可勝言唐之飛錢宋之交會實爲中國紙幣之始當時議者僉謂以輕代重以虛代實深慮僞造日多勢不可久要知紙幣原冀商民利便實爲財政之機關果其立法之初詳

審周密先求盡善必能全收其利而不受其害東西各國於發行紙幣以及一切簿籍契券各項官紙凡有價值者皆由政府主其權嚴防民間之私製其有私造者從重科罪而尤恐人心徇利甚於畏法故於造紙印刷之事特意注重精益求精務使民間無從仿效其造紙也選料程功必得質地勻潔堅韌與尋常束楮迥異更加以水印暗花爲特別之記認是未經印刷之先已隱寓防弊之法其印刷也以機器精鑄銅版極求工細煉製印色備極鮮明又益以電胎銅版鑲出分印雖累萬億而毫釐不爽務使製作精工人人能辨真偽是皆預求立於不敗之地而無作偽之虞惟造紙之與印刷其體則合而爲一其事則分而爲二必各設一局以求精進造紙必擇原料最富水性相宜之地建廠添造印刷一事其工作均從事於機器而電胎製色二種尤係專門科學非得有專精此藝之技師教習不易措手則其建設自以購運機器延聘技師於適中便利之地爲合宜而尤必與臣部及發行紙幣之總銀行相近庶便稽查以上二局設立之地應各求其宜不必定合於一處考之各國莫不皆然臣處臣部現值整頓財政之時亟宜參酌採取妥爲籌辦以立基礎統俟考察之員回京再將局廠建設之處暨派員經理一切事宜妥議章程奏明辦理得旨如所議行○壬寅廷杰奏查接管卷內據華商王紹林洋商伊德等合辦霍家地等處礦務一案經前任都統色楞額奏奉部議所有集款分利招工購地各事宜在在均關緊要必須參酌

合同始能定議等因嗣據該商等呈送華洋簽字合同二紙稟請核咨經前任都統松壽分別咨存在案奴才到任後復准外務部咨開該商等業經訂立合同應仍由熱河都統奏明辦理以符原案各等因當查原訂合同內所有集股分利招工購地各事宜雖經分項註明與部章尙無違背然語意究多含混卽如所指礦地六處除原案所稟霍家地一處外其餘五處將來如推廣開辦自應遵章另爲稟請執照另交礦費另起課銀並訂明開辦期限逾限不辦礦產仍歸還國家原訂合同並未敘及又合同十三條有無意中採得別種礦質卽應稟請給照辦理等語雖經稟准有案然亦祇能在稟准礦地界圖內照章開辦納課方免牽混原訂合同亦未詳細聲明國家利權所在華洋交涉所關事前多一磋商庶事後少一轉輾自應傳詢該商重加商訂以昭慎重正札傳問適值王紹林偕英商譚華卽伊德之代表人來熱據譚華呈驗伊德所給權柄單一紙以昭憑信緣向來外國人辦事本人因事不到卽以此項權柄單交代表人作爲承認之據奴才因將合同內語意含混之處分別摘出飭該商等另議附約三條以發明原訂合同之所未備當經遵飭議呈以爲永遠存據之證查近來華洋礦務交涉之案層見疊出熱河礦產殷富外人時有覬覦惟於合同內將彼此應得權限預爲聲明究可省日後無窮之轉輾奴才爲慎重礦政預杜交涉起見未便以原定合同業經送部稍涉疏略致滋流弊下部議奏 附合同 光緒三十二年

閏四月十四日即西曆一千九百零六年六月五號華商王紹林英商伊德代表人譚華遵熱河都統廷杰面諭另議附約三條分繕三紙經華洋商人與求治局會辦分省試用道何鼎晝押一紙繳存求治局備案一紙交英商伊德代表人譚華收執一紙呈繳都統以便奏咨定案遵辦 一部章指開各條理宜遵辦茲特揭出數條開列於左 集股所有續招股銀均須華洋各半 分利原訂合同第八條業已載明收取課銀當再由都統派員監收 招工原訂合同第十六條內業已聲明礦廠除管理機器外一切工人概用華人不准招僱洋工 購地山主契據應全呈驗原訂合同十七條內所載應造枝路所佔民地如地主不願出賣願將地價作股應由地主之便不得擅用壓力如願出賣糧租仍照原訂合同第五條完納 一原訂合同內所指六處礦地除所稟請霍家地一處外其餘有城子山王家杖子五臺山白山吐柴火欄子五處如該商等推廣開辦務須遵照部章稟請開辦執照並另交礦費另起課銀以上所指各礦三年內如不開辦即須歸還國家 一原訂合同內第十三條有無意中採得別種礦質即應稟請都統給照照章辦理等語惟所稱無意中採有別項礦質祇准在已經稟請批准開辦礦地界圖內照章開辦納課尋外務部商部奏查原約第一條所開如續招股銀須華洋各半收取課銀由都統派員監收礦工概用華人佔用民地不得擅用壓力並第三條所開無意中採有別種礦質祇准在批准界內開

辦各等語皆爲原訂合同之所未詳防閑自較周密惟第二條內開原訂合同所指大處礦地除霍家地一處外其餘有城子山王家杖子五臺山白山吐柴火欄子五處如推廣開辦須遵部章稟請執照等語查王紹林稟原案祇請開辦霍家地暨城子山王家杖子三處礦地嗣經前任都統色楞額奏該員照華洋合辦之例與洋商伊德簽訂合同推廣至五臺山等處業經外務部核與原案不符現在核訂合同自應仍照原案准辦霍家地等三處此外不得預爲指定礦地多處致滋弊混至霍家地一處既經前任都統發給執照准其開辦應由熱河都統卽將該礦佔地詳細里數四至界限繪圖送部查核飭令取具保單照費換領部照以符定章其城子山王家杖子二處將來如推廣開辦應卽一切遵照商部奏定礦章呈候核准由部頒領執照再行開辦仍照熱河都統原定附約三年內如不開辦卽作罷議如有他商請辦該公司不得干預又原合同第六條所指各礦必須由官發給執照應改爲呈明都統咨請商部發給執照方准開辦第七條不得私將執照轉賣他人一節應照商部礦章改爲如欲將執照轉授他商應具稟商部聽候准駁倘私相授受一經商部覺察卽將礦照撤銷礦工入官第八條常年課銀認交一千兩礦產出井之金按值百抽六銀按值百抽八呈交課款應改爲礦產出井金銀均按值百抽十完納井口稅其出口之稅仍遵海關稅則照章交納查原訂各節雖係按照熱河礦務專章辦理惟現定部章礦產

出井稅金銀均值百抽十自應改歸一律熱河原議每年認交課銀一千兩應予刪除先交之銀並准抵完礦稅第十二條日後如各國欽使與中國國家定立各項礦務新章亦應援章辦理應改為日後中國國家定立各項礦務新章該公司亦應遵照辦理第十七條修造枝路以便運銷礦產應照商部礦務章程改為轉運礦產欲造小枝鐵路應查明相距水口是否在十里以內與該處地方有無窒礙稟候商部核奪若程途在十里以外者應另案辦理於第十七條後添敘一條聲明此項合同未經駭載各事概照商部奏定礦務章程辦理以上各節應請 飭下熱河都統轉飭該商等遵將原訂合同並此次附約重加釐訂咨部核定再行畫押以重礦政得 旨如所議行○癸卯雨○乙巳 上詣 大高殿報謝○己

酉 慈禧端佑康頤昭豫莊誠壽恭欽獻崇熙皇太后 皇上御乾清宮義國使臣巴樂禮偕同義國親

王費爾迪安德觀見○上奉 慈禧端佑康頤昭豫莊誠壽恭欽獻崇熙皇太后幸頤和園駐蹕○外務

部商部戶部奏竊商部於光緒二十九年十月十四日具奏重訂鐵路章程繕單呈 覽一摺奉 旨依

議欽此通行欽遵在案查原章第四條內開公司買地應由地方官估定公平價值毋許高擡應完地租由公司按年認繳不得拖欠等語是鐵路佔地納稅早已載明定章現在各省路務先後開辦縱橫綿互佔地日多此次地稅應再切實申明俾有遵守凡各省官紳承辦鐵路所有佔用地畝除官道官河向來

本不納稅應毋庸議外其購買民間地畝一經過割糧隨地轉卽由各該州縣會同該處辦路官紳勘丈明確仍照原額科則歸入鐵路公司卽應繳納若干務與原數相符不至有虧正額至借款官辦各路其合同條款切實載明不納地稅者暫行免收一俟合同年滿應卽照繳嗣後官辦商辦各路均不得率行請免賦稅以重稅課而符定章得 旨如所議行○商部奏

臣部於光緒三十一年六月間接據浙江京

官翰林院侍讀學士黃紹箕等呈請由本省紳商自辦全浙鐵路公舉前署兩淮鹽運使湯壽潛候補四

五品京堂劉錦藻總理其事等情當由

臣部於七月二十六日據呈奏請奉

旨湯壽潛著賞給四品卿

銜餘依議欽此嗣經

臣部傳知該紳等欽遵辦理並令通盤計畫妥訂詳細章程去後復據該紳黃紹箕

等呈稱京外紳商函電往復遵照商律公同集議詳晰釐訂章程十章八十三節繕具清摺呈請立案又

准大學士王文韶刑部尙書葛寶華戶部侍郎陳邦瑞刑部侍郎沈家本工部侍郎胡燏棻等函同前因

並稱全浙鐵路旬日間集股二百餘萬目下正在續招此項章程由該總理湯壽潛等會同中外官紳士

商切實酌擬經文韶等閣定應請核准飭遵各等語

臣等伏查浙江全省鐵路關繫交通至爲重要該省

京外紳商和衷商榷勉力自辦洵屬顧全大局所訂路章大致遵照

臣部奏定公司律有限公司辦法於

股東董事查帳人辦事職員各項權限分晰至爲詳審自足以互聯團體預杜流弊自應准予立案謹將

該紳等原擬章程敬繕清單恭呈 御覽如蒙 俞允應由 臣等傳知該紳等咨行該省督撫欽遵辦理

得 旨如所議行○庚戌兩○諭前據御史黃昌年奏參江西藩司周浩執法徇私各款當經諭令張之洞確查茲據查明覆奏該藩司貪污縱恣把持省權專任私人貽誤大局周浩著卽行革職至開辦銅元購辦機器諸多不實不盡及官銀號款項並未移還著吳重熹再行澈底嚴查照數追繳以重公款江西補用知府崔湘鑽營謬妄生事害民永新縣知縣張善鐸貪污卑賤小人之尤均著革職永不敘用江蘇補用直隸州知州吳澧貪詐惡劣公款不清試用知縣黃錫光營謀署缺不知廉恥指分江蘇知州徐履泰鄙俗迎合多滋物議江西補用知縣張學勳歷充優差損公肥私試用道陳際清險惡招搖行同無賴均著卽行革職江蘇候補道繆德榮濫廁要差衰耄無能著勒令回籍候補知府王祖蔭巧滑專擅難資表率著以州同降補知縣桓祖彝品行卑污敗壞風氣丁憂知縣崔寶瑛行徑猥鄙指摘交加知縣朱士元倚勢招搖聲名極劣試用巡檢董鴻品行污下衣冠敗類均著卽行革職幕友華枚生著查明有無職銜卽行斥革並遞解回籍交地方官嚴加管束華玉堂馮心畬馮履卿馮冕均著一併驅逐不准逗遛江西司事金朝正著拿獲交地方官嚴加管束家丁熊濱著拿獲解回原籍禁押一年限滿仍嚴加管束不准出外生事餘著照所請辦理該部知道○惲毓鼎奏 臣竊見四月間江蘇督撫因調劑屬員擬將地丁

錢糧每兩加收制錢二百文經戶部議駁乃一再瀆請本月又有加收上忙之奏仰維 皇太后 皇上

軫念民艱無時不以蒼生爲意故上月二十日恤民之 詔甫下 天心感應立沛甘霖寶海內外咸歌

仁德該督撫臣身膺疆寄不能仰體

聖慈期月之間重徵之疏三上首加牙帖向之每年徵銀五兩

者今則加十倍而徵五十兩矣次加稅契凡光緒二十五年前大學士剛毅已經清釐限定之數今則覆

加搜剔新舊遠近纖悉不遺矣乃復聽信屬員之稟堅請加賦併力兼營同時並舉臣恐東南民力盡矣

查二十八年

前督臣劉坤一

以賠款甚迫奏請於定價二千文之外加收錢二百文以抵賠款當日即以

規復同治七年舊價爲詞今該督撫臣乃忽以新加二百文納入舊價之內撥還各州縣廳而另借賠款

名目再加二百文設使將來州縣困窮又可以二千四百文爲舊價再擬酌加矣查該督撫原奏一則曰

州縣公費太少再則曰州縣辦公竭蹶是祇知體恤屬吏而不知體恤農民屬吏不足於民取償民間不

足將於何取償乎且新政之行無非爲保安民生而設臣竊見各省大吏動以舉辦新政爲詞爲竭澤而

漁之計是行政之效未見而屬民之害先形恐亦非

聖主制治保邦本意也可否 飭下戶部體察情

形妥議覆奏再

臣聞該督撫

臣一面奏請一面已通飭各州縣加收民間方以銅元價賤日用物價因而

增長度日維艱今更加徵丁銀折價小民勤動終歲不足自給其苦可知督臣乃謂民情相安似非實事

若謂各州縣已有加收之處應由戶部飭令流抵下忙完數不得遷就其間歟歸中飽又奏近來時局日
新民財日困州縣之辦事益艱而聚歛之心亦益急不肖者但爲取盈之計不復爲久遠之謀吏治之壞
原本於斯此次江蘇丁銀加價戶部以恤民爲心或始終持平議駁但恐該州縣等必不甘心將設法取
償於後臣愚請飭下江蘇督撫臣嚴飭各州縣徵收丁漕凡民間完納銀元應照市價折錢不得違例
不收銅元自定櫃價至冬漕折價屆時藩司應照市價核定不得擡價病民如大吏徇情庇護一併參處
庶培克無所施而小民受惠無窮矣下戶部議奏○辛亥以沈瑜慶爲江西布政使朱壽鏞爲廣東按察
使○商部奏臣部接據上海南北市錢業元大亨等合詞稟稱錢業定章遇有來往商號因虧倒閉所欠
洋欸莊欸須俟結清後於欠戶還欸內按照成數華洋各商一律公攤歷經稟辦有案今各省分滙銀行
官銀號既許各商號脫手往來與莊等同茲利益自應與莊等同其責任設遇倒閉虧欠亦惟查照定章
於欠戶還欸內按成均攤乞咨請財政處立案等情核與臣部會同修訂法律大臣奏定破產律第四十
條帑項公欸經商家倒閉除歸償成數仍同各債主一律辦理外地方官應查明情節如果事屬有心應
照倒騙律嚴加治罪等語尙屬相符當經據情咨商財政處去後旋准覆稱查各國銀錢行業皆受成戶
部或且以資本之半存之中央金庫而所用簿籍戶部併有隨時飭令檢查之權查察極爲嚴密不患有

欺飾隱匿之弊是以偶遇虧倒破產之法可以實行今中國各項貿易皆任便開設公家並未加以監察若遇有倒閉准其一律折扣恐存主受虧必甚現在戶部銀行存放多係部款關係極重暨各省官銀號銀行多係公款均應暫照舊章辦理所有該商稟請立案之處礙難照准等因臣等查破產律第四十條商家倒閉帑項公款歸償成數同各債主一律本係查照各國通例辦理俾昭平允茲准財政處覆稱前因自應將此條暫緩實行報聞○甲寅商部奏西潼鐵路加徵土釐作為路股俟工程告竣即行停徵得旨如所議行○乙卯兩○以黃培松為廣東瓊州鎮總兵○丙辰袁世凱奏前准政務處咨開准學務處咨奏覆專設法律學堂暨添設仕途速成科一摺於光緒三十一年七月初三日奉 旨依議欽此錄奏咨行前來查原奏內聲明請飭下政務處通行各省並查取直隸法政學堂章程參酌認真辦理等因當即將現行章程錄送政務處備案並咨行各省查照各在案臣維作始貴乎審慎立法不厭周詳矧法政學堂為他日創制之本原自強之基礎非有專門學問者恐不免有輕重失當之虞故雖試辦半年未敢形諸奏牘現飭該司道等督同留學畢業生詳加釐訂業據再三斟酌議覆前來就原章學科辦法與管理規則分為兩編其關乎學堂全體大綱不容輕易刪改者謂之學堂章程其堂中管理條項臨時可以酌量增減者謂之管理條規章程以垂久遠條規得由管理隨時損益此其大略也至其大要約分四

端一曰學額蓋佐理新政莫急於得人澄清仕途莫先於興學原擬專招本省候補人員不拘班次大小但年齡文理合格者均得入堂肄業嗣後經臣奏明將安徽等省舉人揀發來直並令入堂畢業後分別奏留以供任使至本省士紳各署幕僚皆有佐治之責亦分別籌設學堂兼營併進庶幾人知法理戶解律文政治改良此爲樞紐二曰課程政治專門浩若煙海非資深造難言大家然而求治之殷安能坐待著籍之士已逾學齡是用採擷精英企圖急就分設科目頗資籌商先授豫科半年以植其基繼授正科一年又六月以廣其用律例會典成案約章爲仕途者所必知先須注重其他民刑等諸法與夫憲法經濟等諸學皆當探東西之長以收甄採之效三曰管理向日之課吏館不過如舊時書院既無講堂授課之事卽乏羣坐習業之儀今既改學堂自當悉遵通則寢興飲食有定時藏修息游有常度總期在堂人員莫不有推崇公德之意以習於確守規律之常四曰經費舊有課吏館常款歲需庫平銀一萬四千餘兩今改學堂除活支外歲需額支庫平銀三萬一千四百餘兩所短之數均由藩司撥補惟以各省情形不同未便列入定章致多窒礙臣覆核之餘尙屬妥善除飭令該司道等按照新章切實辦理並分別補咨外理合繕具清單恭呈 御覽下所司知之○己未商部奏光緒三十二年五月初六日准政務處咨議覆直隸總督袁世凱奏請另行核議路務議員一摺於五月初五日具奏奉 旨依議欽此欽遵鈔咨

到部原奏內稱擬請飭下商部將各省路務事宜詳細調查妥訂規則頒行遵守其度材用人工程運輸款項一切仍責成該管大臣督率在事人員認真經理隨時咨報商部考核分別准駁部中亦可隨時揀派妥實司員分往考察報部咨行該管大臣查照整頓如蒙俞允其商部所訂章程內有應行刪改之處應由該部自行酌改以期周密而便遵行各等語此案先於四月間由直隸總督袁世凱鈔錄原奏咨會前來臣等伏查中外古今治亂之關鍵惟一言以決之曰通與隔而已周易否泰之機卽通與隔之所爲倚伏自古內外上下之情通則諸事聯絡而政治以理內外上下之情隔則諸事蒙蔽而政治以紛臣部議員之設意在通內外上下之情非特輔臣部智慮之所未周正所以佐各管路大臣暨辦路地方各督撫耳目之所未逮也此不必遠徵之東西各國卽以中國體制言之各省關道得與外務部戶部直接督糧道得與戶部直接新設之提學使得與學部直接皆所以廣備諮詢用便考察其大要均在化隔爲通初不致有侵犯權限之弊是以臣部原訂路務議員章程十二條大概注重調查報告俾得隨時稽考以期興利除弊此次議員雖係臣部札派而查照原訂章程第一條第四條第十條仍載明由管路大臣辦理地方督撫咨送履歷出具考語查得聞見所及仍隨時稟報管路大臣辦路地方督撫核辦權限本極分明各議員身爲僚屬亦何敢侵越管路大臣暨地方督撫權限至第二條所載臣部章京及畢業

學生得派幫辦路務在臣等議訂之意不過以臣部章京現就畢業學生內調充將來或有熟習路務專門之員不必因臣部一經調用遂令無地以見專長而各路需才孔亟正可令其實驗以資臂助真才難得要政所關臣等初不敢存內外畛域之見第三條三年考成一節係指臣部給札三年以後而言各處承辦路工人員功過臣部原有稽核之責即不敢無懲勸之條至各該議員之黜陟進退仍係各該管鐵路大臣暨辦理地方督撫之權臣部未便干涉第五條議員久任一節誠以各省舉行新政百端待理才識較優之員往往檄委過多不能久於其職既由臣部派充議員如有別項差委自應咨商臣部俾可接洽另行遴派委員此亦尋常辦公例有之事第十一條路務議員逕覆臣部一節是即為掃除隔膜起見至該議員調查之事由臣部咨會各管大臣及辦路地方督撫既非議員之責原訂章程內是以未經敘明按照袁世凱原奏內稱臣非謂議員不當設使商部遴派議員調查各項事件舉凡當興當革當損當益之故一一周稽博考洞悉靡遺呈由商部詳加採擇訂為章制通飭遵行或咨商管路大臣等查核辦理即於部務為盡職於路務為有益等語是其意亦在通內外上下之情揆諸臣等訂章之意原無不合之處要之邇來朝廷注重路政臣部職任所在不得不加意周詳祛除積習政務處覆奏所稱補偏救弊實備知臣等苦心現在既經奏奉諭旨由臣部自行酌改章程臣等公同商酌謹將章程第二第

三第五第十四條妥爲改訂繕具清單恭呈 御覽如蒙 俞允再由臣部通行遵照辦理竊維方今時事多艱全在內外協合上下通徹庶足以佐成要政宏濟艱難此臣等所日夕兢惕冀有以仰副 恩命而亦竊願與各疆臣各管路大臣共勉之者也得 旨如所議行○辛酉戶部奏內閣鈔出兩江總督等覆奏蘇州徵收三十二年上忙銀價仍請每兩加錢二百文湊抵賠款照案帶徵一節光緒三十二年五月初五日奉 硃批戶部知道欽此欽遵又據翰林院侍讀學士惲毓鼎奏疆臣藉詞加賦請 飭部妥議並各州縣徵收丁漕完納銀元應照市價折錢各摺片均於五月十四日奉 旨戶部議奏欽此欽遵由軍機處交出到部據該督臣等覆奏大略謂蘇省銀價驟漲各州縣徵收丁糧每兩折收二千文入不敷出請於上忙加收折價錢二百文共合二千二百文以符同治七年收數其賠款仍帶徵二百文照案徵解現在各屬概已啟徵民間完納均尙相安懇請 恩准而該侍讀學士惲毓鼎所奏則以當日繳抵賠款卽以規復同治七年舊價爲詞今該督撫臣忽以新加二百文納入舊價之內撥還各州廳縣而另借賠款名目再加二百文惟知體恤屬員而不知體恤人民且一面奏請一面通飭各屬加收民間錢賤物貴度日維艱今更加徵丁銀折價小民不足自給其苦可知督臣乃謂民情相安似非實事又另片奏徵收丁漕民間完納銀元應照市價折錢不得違例不收銅元自定櫃價等語臣等竊維國以民爲本

設官原以保民從未有剝民以肥官者也前該督等以銀貴錢賤請將賠款規復之二百文撥還各州縣而另行帶徵二百文以作賠款經臣部議駁奏請飭令照常徵解奉 旨依議欽此欽遵行知該省在案今該督等仍以前情一再瀆請如果應加前此臣部卽毋庸議駁卽此次該省京員亦可不必另行陳奏此其間誠有礙難照准者不得不爲我 皇太后 皇上剴切陳之查蘇省徵收錢糧自同治四年奏定每兩連公費折收錢二千文七年銀價每兩易錢一千七百文因加收二百文共二千二百文二十二年銀價減落仍復每兩二千文之舊至二十八年賠款急迫前督臣劉坤一奏請規復七年銀價每兩加收二百文是民間完納丁糧刻下固已二千二百文矣今該督臣等以銀價與七年相埒完納二千二百文之外更請加徵二百文試問規復錢價之二百文出於各州縣乎抑仍是出諸民也若猶是出諸民也則合之各屬所收之二千文與同治七年所徵之數無以異若再加二百文則是每兩二千四百文矣增減固視乎時而目下該省錢價尙未至於此也況該督等前奏請將各屬所收規復銀價之二百文發還各州廳縣今則謂其賠款二百文原與銀價無涉顯係自相矛盾又稱各屬解徵一兩連補平火耗需錢一千八百餘文所餘公費僅一百數十文較同治四年所定相去已多等語查蘇省賦額除荒災蠲緩各項外每年所收正銀約一百二十三十萬兩以每年餘錢一百數十文計之約得銀一錢有餘合通省一年計